

Meeqqat Atuarfianni atuartut akornanni pimmatiginnittarneq pinaveersaartinniarlugu periusissiamik kingusinnerpaamik UPA2020-mi saqqummiunneqartussamik Naalakkersuisut peqquneqarnissaannik Inatsisartut aaliangiiffigisassaattut siunnersuut. Periusissiap atuutsinneqalernissaanut suliniutit assigiinngitsut qaqugukkut aallarnisarneqarnissaannut piffissalersuut ilanngunneqassaaq.

(Inatsisartunut ilaasortaq Aqqa Samuelson, Inuit Ataqatigiit).

Akissuteqaat

(Ilinniartitaanermut, Kultureqarnermut, Ilageeqarnermut Nunanullu Allanut Naalakkersuisoq)

Aappassaaneerinninneq

Naalakkersuisut Ilinniartitaanermut, Kultureqarnermut, Ilageeqarnermut Nunanullu Allanut ataatsimiititaliaq qutsavigaa, tamarmiullutik isumaqataallutik ataatsimiititaliami sukumiisumik suliaqarsimanerannut aammalu allannguutissatut siunnersuummut nassiussamut tapersersiinerannut.

Naalakkersuisut ataatsimiititaliaq isumaqatigaat pimmatiginnittarnermik pinaveersaartitsinissaq kikkut tamat akisussaaffigimmassuk, pimmatiginnittarnerlu assigiinngitsutigut saqqummertarmat. Taamaammat periusissaq tamakkiisumik isigisoq paaqqinnittarfinni, atuarfinnilu kiisalu inuusuttut ilinniarfiini atitullunilu tamatigoortuusariaqarpoq, suliarineqarneralu Naalakkersuisoqarfiit assigiinngitsut akimorlugit qanimut suleqatigiinnikkut ingerlanneqartariaqarpoq, kommunit susasaqartullu allat pimmatiginnittarnermut pinaveersaartitsinissamut akiuiniarnermullu suliniuteqartut peqatigalugit.

Ataatsimiititaliap inassuteqatai periusissiamik suliaqarnermut ilanngunneqassaaq.

Naalakkersuisut taamatut oqaaseqarlutik allannguutissatut siunnersuutip akuerineqarnissaa inassutigaat.